



Халқ сўзи

Ўзбекистон —
келажаги
буюк
давлат

2025 йил — АТРОФ-МУҲИТНИ АСРАШ ВА «ЯШИЛ» ИҚТИСОДИЁТ ЙИЛИ

1991 йил 1 январдан чиқа бошлаган

WWW.XS.UZ

E-mail: Info@xs.uz

2025 йил 15 август, № 166 (9061)

Жума

Сайтимизга ўтиш учун QR-кодни телефонингиз орқали сканер қилинг.



ЎЗБЕКИСТОН РЕСПУБЛИКАСИ ПРЕЗИДЕНТИ ФРАНЦИЯ ЭЛЧИСИНИ ҚАБУЛ ҚИЛДИ

Ўзбекистон Республикаси Президенти Шавкат Мирзиёев 14 август куни мамлакатимиздаги дипломатик миссиясини якунлаётган Франция Республикасининг Фавкулодда ва мухтор элчиси Орелия Бушезни қабул қилди.



Давлатимиз раҳбари Франция элчисининг самарали фаолияти ҳамда мамлакатларимиз ўртасидаги стратегик шериклик муносабатларини ривожлантириш ва мустаҳкамлашга қўшган шахсий ҳиссасини алоҳида қайд этди.

Бўлиб ўтган олий даражадаги ўзаро ташрифлар Ўзбекистон — Франция ҳамкорлигини сифат жиҳатдан янги босқичга кўтариш, унинг кун тартибини аниқ мазмун билан бойитишга хизмат қилгани таъкидланди.

Турли даражаларда тизимли мулоқот ва фаол алоқалар йўлга қўйилган. Савдо-иқтисодий соҳада сезиларли муваффақиятларга эришилди: кейинги йилларда товар айирбошлаш 4 баробар кўпайди, Франциянинг етакчи компания ва ташкилотлари билан умумий қиймати 10 миллиард доллардан зиёд лойиҳалар амалга оширилмоқда.

Таълим, соғлиқни сақлаш ва маданий-гуманитар алмашинув соҳаларида муҳим дастурлар амалга оширилмоқда. Лувр музейи ва Араб дунёси институтида кўргазмалар катта муваффақият билан ўтди. Париж шаҳри яқинида Беруний ҳайкали очилди. Франция пойтахтидаги кўчага Самарқанд номи берилди. Жорий йилда Тошкент шаҳрида Ўзбекистон — Франция университети ўз ишини бошлади.

Учрашув якунида Ўзбекистон Президенти Франция Республикасининг Фавкулодда ва мухтор элчиси Орелия Бушезга мамлакатларимиз ўртасида дўстлик ва стратегик шериклик муносабатларини мустаҳкамлашга қўшган катта ҳиссаси учун «Дўстлик» орденини топширди.

Элчи хоним унинг дипломатик миссияси юксак баҳолангани ҳамда Ўзбекистон ва Франция ўртасида кенг қўламли ҳамкорликни ривожлантиришни ҳар томонлама қўлаб-қувватлаётгани учун давлатимиз раҳбарига самимий миннатдорлик билдирди.

Ў.А.

Ўзбекистон Республикаси Президенти
Матбуот хизмати сурати.

Ўзбекистон Республикаси Президентининг ФАРМОНИ

ЎЗБЕКИСТОНДАГИ БИР ГУРУХ ФАЛАСТИНЛИК ФУҚАРОЛАРГА ДАВЛАТ ҒАМХЎРЛИГИ, МЕҲР-ШАФҚАТ ТАМОЙИЛАРИ АСОСИДА КЎМАК БЕРИШ ТИЗИМИНИ ЙЎЛГА ҚЎЙИШ ЧОРА-ТАДБИРЛАРИ ТЎҒРИСИДА

Инсон ҳаёти, шаъни ва кадр-қимматини улуғлаш, муҳтожларга меҳр билан ёндашиш, эзгулик ва адолат тамойилларига содиқ қолиш динимиз, маданиятимиз ва анъаналаримизнинг ажралмас қисми ҳисобланади.

Сўнгги йилларда юртимизда давлат ва жамият ўртасида инсонпарварликка асосланган муносабатларни янада мустаҳкамлаш, эҳтиёжмандларга ёрдам кўрсатишга алоҳида эътибор қаратилмоқда.

Бу эзгу йўналишда юртимиз ҳар қандай даврларда ўз бағрикенглиги, меҳр-шафқати ва инсонпарварлик анъаналарини намоён этиб келмоқда. Жумладан, Ўзбекистонга олиб келинган фаластинлик фуқароларга (кейинги ўринларда — меҳмонларга) бошпана берилиши ҳамда кўмак кўрсатилиши халқимизнинг асрлар давомида шаклланган қадриятларга содиқлиги ва давлатимизнинг ҳақиқий инсонпарварлик сиёсати амалда ифода бўлаётганидан далолат бермоқда.

Меҳмонларга адолат тамойили асосида доимий ғамхўрлик ва ижтимоий кўмак кўрсатишни таъминлайдиган механизмларни жорий этиш мақсадида қарор қиламан:

1. Меҳмонлар ижтимоийлашувини таъминлаш

1. Меҳмонлар учун қулай шароитлар яратиш мақсадида қуйидаги ишлар бажарилгани маълумот учун қабул қилинсин:

а) меҳмонларни вақтинча яшаш объектларига жойлаштириш, уларнинг бирламчи эҳтиёжлари юзасидан масалалар ҳал этилди;

б) меҳмонларни тиббий кўрикдан ўтказиш ва зарур дори-дармонлар билан таъминлаш чоралари кўрилди;

в) меҳмонларнинг жамиятга интеграция қилиниши ва маънавий қўллаб-қувватланишини таъминлаш мақсадида маданий-маърифий учрашувлар ва дўстлик кечалари каби тадбирларни (шу жумладан, болалар учун) ўз ичига олувчи махсус дастурлар ташкил этилди.

II. Меҳмонларни жамиятга интеграция қилиш ишларини жадаллаштириш

2. Фаластинлик беморлар ва уларга ҳамроҳлик қилувчиларни Ўзбекистон Республикасида яшашга мослаштириш жараёнига кўмаклашиш бўйича Республика комиссияси (кейинги ўринларда — Республика комиссияси) таркиби **1-иловага** мувофиқ тасдиқлансин.

3. Қуйидагилар Республика комиссиясининг **асосий фаолият йўналишлари** этиб белгилансин:

а) меҳмонларга яратилган имкониятларни рўёбга чиқариш юзасидан давлат органлари ва ташкилотлари фаолиятини мувофиқлаштириш;

(Давоми 2-бетда).



БЕПАРВОЛИК ВА ҚОНУНБУЗАРЛИК — ЖИНОЯТЧИЛИКНИНГ БОШ ОМИЛИ

Кеча Наманган вилоятининг Поп туманида Олий Мажлис Сенати Раиси Танзила Норбоева бошчилигида Коррупцияга қарши курашиш бўйича миллий кенгашнинг сайёр мажлиси бўлиб ўтди.

Сайёр мажлис

Наманган вилоятида криминоген вазиятни барқарорлаштириш ҳамда коррупцияга қарши курашиш борасидаги ишлар ҳолати кўриб чиқилган мажлисда миллий ва ҳудудий кенгашларнинг аъзолари, сенаторлар, халқ депутатлари вилоят, шаҳар ва туман Кенгашлари депутатлари, вазирлик

ҳамда идоралар раҳбарлари, фаоллар иштирок этди.

Таъкидланганидек, бугунги кунда вилоятнинг иқтисодий салоҳияти юқори бўлиб, меҳнатга лаёқатли аҳолининг 82 фоизи кичик бизнес ва тадбиркорлик соҳасида банд. Жорий йилда 4 млрд. доллар миқдорида

инвестициялар жалб қилиш, 1 млрд. долларлик экспорт, 323 минг иш ўрни яратиш ва 55 минг оилани камбағалликдан чиқариш режалаштирилган.

Жиноятчиликка оид кўрсаткичлар ҳам таҳлил қилинди. 2024 йилда вилоятда жами 8 204 та жиноят қайд этилган. Уларнинг 35 фоизи кибержиноятлардир. Жорий йилнинг етти ойида эса 5 786 та жиноят содир қилинган, шундан 45,6 фоизи кибержиноятлар ҳисобланади. Қонунбузилишларнинг катта қисми олди олиниши мумкин бўлган туркумга киради. ➡2

АДЛИЯ ВАЗИРИНИНГ АХБОРОТИ ЭШИТИЛДИ

Олий Мажлис Қонунчилик палатасининг навбатдаги “*Ҳукумат соати*” бўлиб ўтди. Унда қонунчилик ҳужжатларини сифатли тайёрлаш ҳамда норма ижодкорлиги фаолиятини такомиллаштириш борасида амалга оширилаётган ишлар тўғрисидаги масала муҳокама қилинди.

«Ҳукумат соати»

Кун тартибидagi масала юзасидан депутатларнинг саволларига адлия вазирини Акбар Тошқулов жавоб берди.

Қайд этилганидек, янги Ўзбекистоннинг қонунчилик базаси ислохотларга ҳамроҳан тарзда юқори суръатларда янгиланмоқда. Ҳозирги кунда норматив-ҳуқуқий ҳужжатлар фонди 26 мингдан ортиқ ҳужжатларни ўз ичига олади, шундан 17 мингга яқини ёки 65 фоизи охириги 8 йилда қабул қилинган.

Хусусан, 2016 йилга қадар ҳар йили 15 — 20 та қонун қабул қилинган бўлса, 2024 йилда бу рақам 125 тага етган. Бу — 5 баравар ўсиш дегани. Бундай динамика фақат қонунлар сонининг ортиши билан эмас, балки ислохотлар ҳуқуқий жиҳатдан комплекс таъминланиши, соҳавий ўзгаришларнинг тезкор ва мақсадли ҳуқуқий асослар билан мустаҳкамланаётганини кўрсатади.

Бундай шароитда Қонунчилик палатасига киритилаётган қонун лойиҳаларининг сифатли ишлаб чиқишига эришиш муҳим аҳамиятга эга. Шу нуқтаи назардан, халқ вакиллари қонун лойиҳаларининг қуйи палатага сифатли ва ўз вақ-

тида киритилиши, қонунчилик текникаси қоидаларига мувофиқлиги, ҳуқуқий ва коррупцияга қарши экспертизалардан ўтказилиш ҳолати борасида амалга оширилаётган ишлар тўғрисида вазирлик масъулларидан изоҳ сўради.

Таъкидланганидек, айрим қонун лойиҳаларининг палатагача етарли даражада сифатли тайёрланмаган ҳолда киритилиши Адлия вазирлигининг ҳуқуқий экспертиза соҳасидаги фаолиятини янада такомиллаштириш зарурлигини кўрсатмоқда. Ўз ўрнида вазирлик ва идораларда ҳам норма ижодкорлиги борасидаги кўникма ва масъулият даражаси ҳамон етарли эмас.

Бу, айниқса, Адлия вазирлигида ҳуқуқий экспертиза учун тақдим этилаётган қонун лойиҳаларининг сифат даражасидаги таъминлаш мезониди аққол намоён бўлмоқда. Мисол учун, вазирлик томонидан охириги бир ярим йилда 355 та қонун лойиҳаси ҳуқуқий экспертизадан ўтказилган. Уларнинг 68 таси (19 фоизи)ни қабул қилиш мақсадга мувофиқ эмаслиги тўғрисида хулоса берилиб, ваколатли органларга киритилишининг олди олинган. ➡3

ЭКСПОРТ УЧУН ИМПОРТ ҚИЛИНАЁТГАН ПАХТА

Ўзбекистоннинг жаҳон тўқимачилик бозоридаги стратегияси

Кейинги пайтларда Ўзбекистон ўзининг йирик ишлаб чиқариш ҳажмларига қарамай АҚШдан пахта харид қилиши мумкинлиги ҳақидаги хабар кенг муҳокама этилмоқда. Бу ҳолат ажабланарли туюлади. Сабаби мамлакат анъанавий пахта экспортчиси бўлиб келган. Лекин бу ерда гап Ўзбекистон тўқимачилик маҳсулотларининг жаҳоннинг премиум бозорларидаги мавқеини мустаҳкамлашга қаратилган стратегик қадам ҳақида кетмоқда.

Долзарб мавзу

Тўқимачилик саноатининг жадал ўсиши

Сўнгги йилларда Ўзбекистон тўқимачилик саноатида катта ижобий ўзгаришлар рўй берди. 2017 йилдан буён калава ип ишлаб чиқариш ҳажми 412 минг тоннадан 970 минг тоннагача, трикотаж мато бўйича ўсиш 68 минг тоннадан 312 минг тоннагача, тайёр кийим-кечак ишлаб чиқариш эса 960 млн. донадан 3,1 млрд. донагача ошди. Бу кўрсаткичлар мамлакат ичида пах-



тани чуқур қайта ишлаш ва тайёр маҳсулот экспортини рағбатлантириш сиёсати натижасидир. Ҳақиқатан ҳам, агар 2016 йилда Ўзбекистон тўқимачилик маҳсулотлари экспорти қарийб 1,1 млрд. АҚШ долларини ташкил қилган бўлса, 2024 йилга келиб бу кўрсаткич 2,8 млрд. долларга етди. Бу эса тармоқнинг халқаро бозорлардаги рақобатбардорлиги

ошганидан далолат беради. Бугунги кунда Ўзбекистонда етиштирилган пахта ҳосили тўлиқ маҳаллий корхоналарда қайта ишланиб, пахта толасини ўзимизда қайта ишлаш даражаси 100 фоизга етган. Ўзбекистон тўқимачилик фабрикаларининг маҳсулотлари ҳозирда 75 дан ортиқ мамлакатга экспорт қилинмоқда. ➡4

Ў.А.

